

Kebebasan bersuara bukan tiket sebar berita palsu

Guna fikiran matang nilai maklumat elak masyarakat rosak, runtuh

Oleh Zanariah Abd Mutalib
zanariah_mutalib@bh.com.my

Kuala Lumpur: Kebebasan bersuara yang diperuntukkan dalam undang-undang bukan 'tiket' untuk rakyat di negara ini menyebarkan berita palsu dan mencela orang lain secara terbuka.

Kebebasan itu seharusnya dipraktikkan dengan matang, bukan disalah gunakan sehingga boleh merosak dan meruntuhkan sistem masyarakat dalam jangka masa panjang.

Mufti Wilayah Persekutuan, Dr Luqman Abdullah, berkata agama Islam sebagai contoh begitu menekankan umatnya untuk menyemak terlebih dahulu sesuatu ber-

ita sebelum disebarluaskan kepada orang lain.

"Apabila berita yang belum tentu sahih dihebahikan, ia menunjukkan masyarakat tidak matang dalam mengamalkan kebebasan bersuara yang diberikan, malah ia tidak berada pada tahap yang diharapkan kerana jika masyarakat matang, perkara begini tidak akan berlaku."

"Agama Islam turut menyatakan apabila datang kepada kamu orang fasiq membawa berita, hendaklah diambil dan dibuat semakan dahulu sebelum menyebarkannya. Ini satu perkara yang jelas dalam al-Quran dan hadis larangan lain seperti perbuatan mengumpat dan mencela yang merujuk kepada perkara yang tidak disukai orang lain serta tidak benar."

"Ini dasar dalam Islam kerana ia merosakkan masyarakat. Apabila masyarakat dibina dengan cara tidak betul, maka akan runtuuh sistem masyarakat itu," katanya kepada BH, semalam.

Luqman berkata, usaha memupuk kesedaran berhubung kepentingan menyampaikan perkata-

ra yang benar perlu dimulakan pada peringkat lebih awal, selain penguatkuasaan lebih berkesan kepada penyebar berita palsu.

"Dalam hal ini, kita ada banyak mekanisme, contohnya sudah ada peraturan tertentu untuk menyekat berita palsu. Ia sudah cukup, cuma perlu dilaksanakan dengan sebaik-baiknya," katanya.

Sementara itu, Pensyarah Kanan Jabatan Syariah, Fakulti Pengajian Islam, Universiti Kebangsaan Malaysia (UKM), Datuk Dr Mohd Izhar Ariff Mohd Kashim, berkata rakyat negara ini bertualah kerana diberi kebebasan untuk menyampaikan pandangan, namun masih ada yang tidak menggunakan peluang diberi itu dengan cara yang betul.

"Saya sebagai seorang penceramah, saya bebas memberi ceramah dan teguran, termasuk di kaca televisyen. Saluran media seperti itu perlu digunakan dengan betul, bukan dengan menyebarkan berita palsu," katanya.

Mohd Izhar berkata, selain masyarakat umum, pemimpin juga perlu menunjukkan contoh de-



Apabila berita yang belum tentu sahih dihebahikan, ia menunjukkan masyarakat tidak matang dalam mengamalkan kebebasan bersuara.

**Luqman Abdullah,
Mufti Wilayah Persekutuan**

ngan tidak menyebarkan berita yang belum tentu sahih.

"Saya ingin menasihatkan pemimpin, jika di pihak kerajaan itu, jika bukan anda sendiri, gajilah penyelidik, begitu juga dengan pembangkang. Ini bagi memastikan setiap fakta disemak dengan betul, bukan dipetik di mana-mana kemudian dibawa ke Parlimen."

"Jika mahu jadi pembangkang, jadilah pembangkang yang bijaksana dan profesional. Biar apa yang dimaklumkan itu adalah fakta," katanya.

Beliau turut menyokong pengubalan akta khusus supaya penyebar berita palsu dikenakan hukuman yang setimpal, sekali gus mendisiplinkan pesalah dan masyarakat.